

備
二百
文

非煙傳

唐 皇甫放 撰

臨淮武公業咸通中任河南府功曹參軍愛妾
曰非煙姓步氏容止纖麗若不勝綺羅善秦聲
好文筆尤工擊甌其韻與絲竹合公業甚嬖之
其比隣天水趙氏第也亦衣纓之族不能斥言
其子曰象秀端有文纔弱冠矣時方居喪禮忽
一日於南垣隙中窺見非煙神氣俱喪廢食息
焉乃厚賂公業之閹以情告之閹有難色復為

厚利所動乃令其妻伺非煙間處具以象意言
焉非煙聞之但含笑凝睇而不荅門媪盡以語
象象發狂心蕩不知所如乃取薛濤牋題絕句
曰一覩傾城貌塵心只自猜不隨蕭史去擬學
阿蘭來以所題密緘之祈門媪達非煙煙讀畢
吁嗟良久謂媪曰我亦曾窺見趙郎大好好才貌
此生薄福不得當之蓋鄙武生麤悍非良配耳
乃復醜篇寫於金鳳牋曰綠慘雙娥不自持只
緣幽恨在新詩郎心應似琴心怨脉脉春情更
泥誰封付門媪令遺象象啟緘吟諷數四拊掌
喜曰吾事諧矣又以剡溪玉葉紙賦詩以謝曰
珍重佳人贈好音綵牋芳翰兩情深薄於蟬翼
難供恨密似蠅頭未寫心疑是落花迷碧洞只
思輕雨洒幽襟百迴消息千迴夢裁作長謠寄
綠琴詩去旬日門媪不復來象憂懣恐事泄或
非煙追悔春夕於前庭獨坐賦詩曰綠暗紅藏
起暝煙獨將幽恨小庭前沉沉良夜與誰語星
隔銀河月半天明日晨起吟際而門媪來傳非

煙語曰勿訝旬日無信蓋以微有不安因授象
以連蟬錦香囊并碧苔牋詩曰無力嚴粧倚繡
櫳暗題蟬錦思難窮近來贏得傷春病柳弱花
歎怯曉風象結錦囊於懷細讀小簡又恐煙幽
思增疾乃剪烏絲闌爲迴緘曰春日遲遲人心
悄悄自因窺覲長役夢魂雖羽駕塵襟難於會
合而丹誠皎日誓以周旋况又聞乘春多感芳
履遠和耗冰雪之妍恣鬱蕙蘭之佳氣憂抑之
極恨不翻飛企望寬情無至憔悴莫孤短韻寧
爽後期悄况寸心書豈能盡兼持非什仰繼華
篇詩曰見說傷情爲見春想封蟬錦綠蛾頻叩
頭與報煙卿道第一風流最損人門媪旣得迴
報徑齋詣煙閣中武生爲府掾屬公務繁夥或
數夜一直或竟日不歸是時適值生入府曹煙
拆書得以款曲尋繹旣而長太息曰丈夫之志
女子之心情契魂交視遠如近也於是闔戶垂
幌爲書曰下妾不幸垂髻而孤中間爲媒妁所
欺遂匹合於瑣類每至清風朗月移玉柱以增

懷秋帳冬缸泛金徽而寄恨豈期公子忽貽好
音發華絨而思飛諷麗句而目斷所恨洛川波
隔賈午墻高聯雲不及於秦臺薦夢尚遙於楚
岫猶望天從素懇神假微機一拜清光九嬪無
恨兼題短什用寄幽懷詩曰畫簷春燕須同宿
蘭浦雙鴛肯獨飛長恨桃源諸女伴等閑花裏
送郎歸封訖召門媪令達於象象覽書及詩以
煙意稍切喜不自持但靜室焚香虔禱以俟忽
一日將夕門媪促步而笑至且拜曰趙郎願見
神仙否象驚連問之傳煙語曰今夜功曹府直
可謂良時妾家後庭郎君之前垣也不渝惠好
專望來儀方寸萬重悉俟晤語旣曛黑象乃躋
梯而登煙已令重榻於下旣下見煙靚粧盛服
立於花下拜訖俱以喜極不能言乃相攜自後
門入堂中背缸解幌盡繢綵之意焉及曉鐘初
動復送象於垣下煙執象泣曰今日相遇乃前
生因緣耳勿謂妾無玉潔松貞之志放蕩如斯
直以郎之風調不能自固願深鑒之象曰揖希


世之貌見出人之心已誓幽庸來奉歡狎言訖
象踰垣而歸明日託門媪贈煙詩曰十洞三清
雖路阻有心還得傍瑤臺瑞香風引思深夜知
是菜宮仙馭來煙覽詩微笑復贈象詩曰相思
只怕不相識相見還愁却別君願得化爲松上
鶴一雙飛去入行雲封付門媪仍令語象曰賴
妾有小小篇詠不然君作幾許大才面目茲不
盈旬常得一期于後庭矣展微密之思罄宿昔
之心以爲魚鳥不知人神相助或景物寓目詆

詩寄情來往頻繁不能悉載如是者周歲無何
煙數以細過撻其女奴奴陰術之乘間盡以告
公業公業曰汝慎言我當伺察之後至直日乃
僞陳狀請假迨如常入直遂潛于里門街鼓旣
作匍伏而歸循墻至後庭見煙方倚戶微吟象
則據垣斜睇公業不勝其忿挺前欲擒象覺跳
去業搏之得其半襦乃入室呼煙詰之煙色動
聲戰而不以實告公業愈怒縛之大柱鞭楚血
流但云生得相親死亦何恨深夜公業怠而假

寐煙呼其所愛女僕曰與我一杯水水至飲盡
而絕公業起將復笞之已死矣乃解縛舉致閣
中連呼之聲言煙暴疾致殞後數日葬於北邙
而里巷間皆知其強死矣象因變服易名遠竄
江浙間洛陽才士有崔李二生常與武掾游處
崔賦詩末句云恰似傳花人飲散空牀拋下最
繁枝其夕夢煙謝曰妾貌雖不迨桃李而零落
過之捧君佳什媿仰無已李生詩末句云艷魄
香魂如有在還應羞見墜樓人其夕夢煙戟手
而言曰士有百行君得全乎何至於片言苦相
詆斥當屈君於地下面証之數日李生卒時人
異焉

虞初志卷六終

Blank page with faint vertical lines and minor stains.



Faint vertical text in archaic script, likely bleed-through from the reverse side of the page.



Blank page with faint vertical lines and minor stains.

